

Informe de legalidade sobre o proxecto de decreto polo que se modifica o Decreto 6/2018, do 11 de xaneiro, polo que se aproban os estatutos do consorcio Axencia para a Calidade do Sistema Universitario de Galicia (ACSUG).

De conformidade co disposto no artigo 43.2 da Lei 16/2010, do 17 de decembro, de organización e funcionamento da Administración xeral e do sector público de Galicia, emito o seguinte

INFORME

1. Marco normativo e competencial

O marco xurídico competencial que atribúe aos órganos da Consellería de Cultura, Educación, Formación Profesional e Universidades a elaboración da presente norma parte do artigo 31 do Estatuto de Autonomía de Galicia, consonte o cal é da competencia plena da Comunidade Autónoma galega a regulación e administración do ensino en toda a súa extensión, niveis e graos, modalidades e especialidades, no ámbito das súas competencias, sen prexuízo do disposto no artigo 27 da Constitución e nas leis orgánicas que, conforme ao apartado primeiro do seu artigo 81 o desenvolvan, das facultades que lle atribúe ao Estado o número 30 do apartado 1 do artigo 149 da Constitución, e da alta inspección necesaria para o seu cumprimento e garantía.

O Decreto 119/2022, do 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades dispón no seu artigo 1 que lle corresponden a esta consellería, entre outras competencias e funcións, a planificación, regulación e administración do ensino regrado en toda a súa extensión, niveis, graos, modalidades e especialidades, e a coordinación do sistema universitario, de conformidade co establecido na Lei orgánica 1/1981, do 6 de abril, pola que se aproba o Estatuto de autonomía de Galicia, nas leis orgánicas reguladoras do sistema educativo español e demais normativa de aplicación.

O consorcio Axencia para a Calidade do Sistema Universitario de Galicia (ACSUG) foi creado mediante convenio de colaboración asinado o 30 de xaneiro de 2001 entre a Xunta de Galicia, a través da Consellería de Educación e Ordenación Universitaria, a Secretaría Xeral de Investigación e Desenvolvemento e as universidades de Santiago de Compostela, A Coruña e Vigo.



O 29 de xaneiro de 2018 publicouse no Diario Oficial de Galicia o Decreto 6/2018, do 11 de xaneiro, polo que se aproban os estatutos do consorcio Axencia para a Calidade do Sistema Universitario de Galicia (en adiante ACSUG)

A promoción e a garantía da calidade do Sistema universitario de Galicia constitúe a finalidade primordial do consorcio e asume para este efecto no ámbito da Comunidade Autónoma de Galicia a consecución dos obxectivos a que se refire o artigo 31.1 da Lei orgánica 6/2001, do 21 de decembro, de universidades (en adiante LOU) e o artigo 69 da Lei 6/2013, do 13 de xuño, do Sistema universitario de Galicia.

O ámbito de actuación do consorcio comprende todas as universidades integradas no Sistema Universitario de Galicia (en adiante SUG), así como os centros que impartan en Galicia ensinanzas universitarias de carácter oficial e validez en todo o territorio nacional nos termos previstos na LOU.

De acordo co disposto no artigo 2 dos seus estatutos, aprobados por Decreto 6/2018, do 11 de xaneiro, o consorcio está constituído coa participación da Administración xeral da Comunidade Autónoma de Galicia, mediante a consellería que ten atribuídas as competencias en materia de universidades e a consellería que ten atribuídas as competencias en materia de investigación, desenvolvemento e innovación, a Universidade de Santiago de Compostela, a Universidade da Coruña e a Universidade de Vigo.

2. Necesidade e oportunidade

A incorporación no sistema universitario de Galicia dunha nova universidade mediante por Lei 12/2021, do 15 de xullo, de recoñecemento da universidade privada Universidad Intercontinental de la Empresa, con sede na Comunidade Autónoma de Galicia, como universidade privada do SUG, obriga a modificar o artigo 2 dos estatutos da ACSUG no que se regula as entidades que integran o consorcio.

O Consello Reitor da ACSUG, na xuntanza celebrada o día 22 de xullo de 2021, acordou admitir á Universidad Intercontinental de la Empresa como novo membro e aprobar a proposta de modificación do artigo 2.1 dos seus estatutos, polo que cómpre darlle unha nova redacción do número 1 do artigo 2 dos Estatutos da ACSUG, co fin de incluír á Universidad Intercontinental de la Empresa entre as entidades que o integran.

3. Tramitación

A Lei 16/2010, do 17 de decembro, establece no capítulo II do seu título II o procedemento de elaboración de disposicións administrativas de carácter xeral. O artigo 41 regula a fase inicial e sinala que a elaboración das devanditas disposicións

Consellería de Cultura, Educación, Formación Profesional e Universidades
Secretaría Xeral Técnica
Edificio Administrativo San Caetano, nº 2, baixo
15781 Santiago de Compostela



iniciárase por acordo da persoa titular da consellería na que se encadre o centro directivo que tivese a iniciativa. Así, o presente proxecto de decreto foi elaborado como anteproxecto pola Secretaría Xeral de Universidades . A documentación achegada nesta fase foi a seguinte:

- Acordo do conselleiro de Cultura, Educación e Universidade (actual conselleiro de Cultura, Educación, Formación Profesional e Universidades) de 23 de marzo de 2022, de inicio do procedemento de elaboración da norma.
- Texto do anteproxecto.
- Memoria de legalidade, acerto e oportunidade.
- Memoria económico-financeira.
- Táboa de vixencias.
- Informe do Servizo Técnico-Xurídico, de 25 de marzo de 2022.

Non consta o certificado de consulta pública previa que esixe o artigo 41.2, dado que a proposta de modificación dos estatutos, presentada e aprobada polo Consello Reitor da ACSUG é unha norma de carácter organizativo interno do propio consorcio que carece de impacto nos intereses particulares da sociedade galega e na actividade económica da Xunta de Galicia e, por tanto, non impón obrigas aos destinatarios da norma.

Logo de finalizar esta fase do procedemento mediante a aprobación inicial do texto como proxecto de decreto polo conselleiro de Cultura, Educación e Universidade, o 29 de marzo de 2023, seguíronse os trámites da fase intermedia previstos no artigo 42 da Lei 16/2010.

Así, na tramitación do proxecto solicitouse informe á Secretaría Xeral da Igualdade —emitido o 7 de abril de 2022—, á Dirección Xeral da Función Pública—emitido o 18 de abril de 2022— e á Dirección Xeral de Planificación e Orzamentos —emitido o 29 de abril de 2022—.

De acordo co artigo 42.9 da Lei 16/2010, remitiuse á Consellería de Política Social (actual Consellería de Política Social e Xuventude) unha análise do impacto demográfico do proxecto e a Dirección Xeral de Familia, Infancia e Dinamización Demográfica emitiu informe con data 8 de abril de 2022.

Consta no expediente o certificado emitido o 3 de xuño de 2022 pola directora da Área de Administración Dixital da Axencia para a Modernización Tecnolóxica de Galicia, de [Consellería de Cultura, Educación, Formación Profesional e Universidades](https://sede.xunta.gal/cve)
Secretaría Xeral Técnica
Edificio Administrativo San Caetano, nº 2, baixo
15781 Santiago de Compostela



exposición pública conforme ao artigo 9 da Lei 1/2016, do 18 de xaneiro, de transparencia e bo goberno, no que se dá conta de que o texto íntegro do proxecto estivo exposto publicamente no portal de Transparencia e Goberno aberto durante o período comprendido entre o 11/05/2022 e o 01/06/2022. No se recibiron suxestións a través do formulario dispoñible no devandito portal.

Consta tamén no expediente certificado do secretario do Consello reitor do consorcio Axencia para a Calidade do Sistema Universitario de Galicia, de acordo favorable á proposta de modificación dos estatutos emitido polo dito órgano colexiado na xuntanza celebrada o día 22 de xullo de 2021.

Figura tamén no expediente certificado de data 10/06/2022 da secretaria do Consello Galego de Universidades de acordo de informe favorable emitido polo dito órgano colexiado no pleno celebrado o día 10 de xuño de 2022.

A Asesoría Xurídica da Consellería de Cultura, Educación, Formación Profesional e Universidades emitiu informe o 27 de xuño de 2022.

De conformidade co artigo 43.2 da Lei 16/2010, de 17 de decembro, de organización e funcionamento da Administración xeral e do sector público de Galicia, por considerar que se axusta á legalidade vixente, informo favorablemente o proxecto de decreto polo que se aproban os estatutos do consorcio Axencia para a Calidade do Sistema Universitario de Galicia (ACSUG).

Santiago de Compostela

Manuel Vila López
Secretario xeral técnico

